

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENI ZAKONA O
PRIKUPLJANJU, PROIZVODNJI I PROMETU
SEKUNDARNIH SIROVINA I OTPADNIH MATERIJALA**

Sarajevo, juni 2015. godine

PRIJEDLOG ZA DONOŠENJE ZAKONA PO SKRAĆENOM POSTUPKU

Vlada Federacije Bosne i Hercegovine predlaže Parlamentu Federacije Bosne i Hercegovine da Zakon o izmjeni Zakona o prikupljanju, proizvodnji i prometu sekundarnih sirovina i otpadnih materijala („Službene novine Federacije BiH“, br. 35/98 i 109/12) donese po skraćenom postupku, u skladu sa odredbom člana 172. Poslovnika Predstavničkog doma („Službene novine Federacije BiH“, br. 69/07 i 2/08) i člana 164. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), koji predviđaju da se zakon može donijeti po skraćenom postupku kad nije u pitanju složen i obiman zakon.

Predložene izmjene su neophodne radi usklađivanja Zakona o prikupljanju, proizvodnji i prometu sekundarnih sirovina i otpadnih materijala sa Zakonom o prekršajima („Službene novine Federacije BiH“, broj 63/14).

ZAKON
O IZMJENI ZAKONA O PRIKUPLJANJU, PROIZVODNJI I PROMETU
SEKUNDARNIH SIROVINA I OTPADNIH MATERIJALA

Član 1.

U Zakonu o prikupljanju, proizvodnji i prometu sekundarnih sirovina i otpadnih materijala („Službene novine Federacije BiH“, br. 35/98 i 109/12) u članu 14. stav 1. riječi: „od 3.000,00 do 15.000,00 KM“, zamjenjuju se riječima: „od 5.000,00 do 50.000,00 KM“.

U stavu 2. riječi: „od 1.000,00 do 3.000,00 KM“ zamjenjuju se riječima: „od 2.000,00 KM do 20.000,00 KM“.

U stavu 3. riječi: „od 300,00 KM do 1.500,00 KM“ zamjenjuju se riječima: „od 1.000,00 KM do 5.000,00 KM“.

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE
UZ ZAKON O IZMJENI ZAKONA O PRIKUPLJANJU, PROIZVODNJI I PROMETU
SEKUNDARNIH SIROVINA I OTPADNIH MATERIJALA

I - PRAVNI OSNOV

Ustavni osnov za donošenje Zakona sadržan je u odredbi tačke c) Amandmana VIII na Ustav Federacije BiH, prema kojoj je u isključivoj nadležnosti Federacije Bosne i Hercegovine utvrđivanje ekonomske politike, i članu IV A. 20 (1) d) Ustava Federacije Bosne i Hercegovine, prema kojoj je Parlament Federacije BiH odgovoran za donošenje zakona u vršenju funkcije Federalne vlasti.

II - RAZLOZI ZA DONOŠENJE ZAKONA

Zakon o prikupljanju, proizvodnji i prometu sekundarnih sirovina i otpadnih materijala je proglašen 1998. godine, a izmjene i dopune istog 2012. godine.

Na osnovu člana IV.B.7. a)(IV) Ustava Federacije Bosne i Hercegovine, donesen je Ukaz o proglašenju Zakona o prekršajima koji je donio Parlament Federacije Bosne i Hercegovine na sjednici Predstavničkog doma od 06.05.2014. godine i na sjednici Doma naroda od 05.06.2014. godine („Službene novine Federacije BiH“, broj 63/14).

Predložene izmjene su neophodne radi usklađivanja Zakona o prikupljanju, proizvodnji i prometu sekundarnih sirovina i otpadnih materijala sa Zakonom o prekršajima („Službene novine Federacije BiH“, broj 63/14).

III - FINANSIJSKA SREDSTVA

Za sprovođenje ovog Zakona nije potrebno osigurati posebna sredstva u Budžetu Federacije Bosne i Hercegovine.

TEKST VAŽEĆIH ODREDBI ZAKONA O PRIKUPLJANJU, PROIZVODNJI I PROMETU SEKUNDARNIH SIROVINA I OTPADNIH MATERIJALA KOJE SE MIJENJAJU

III STIMULATIVNE I KAZNE ODREDBE

Član 14.

Novčanom kaznom od 3.000,00 do 15.000,00 KM, kaznit će se za prekršaj privredno društvo ili drugo pravno lice ako:

1. Ne obavještava nadležni organ o otkrivenim negativnim uticajima na okoliš (član 1.),
2. Uništava otpadne materijale koji se mogu valorizirati (član 3.),
3. Obavlja djelatnost, za koju nije registrovano ili za koju ne ispunjava uslove za obavljanje djelatnosti (čl. 5. i 9.),
4. Vršiti otkup otpadnih materijala čije porijeklo je nepoznato (član 7.),
5. Ne vrši razvrstavanje otpadnih materijala po vrstama (član 8.),
6. Vršiti uvoz i izvoz otpadnog materijala izvan bilansiranog režima uvoza i izvoza (član 10.).

Za prekršaj iz stava 1. ovog člana kazniće se i odgovorno lice u privrednom društvu i drugom pravnom licu novčanom kaznom od 1.000,00 do 3.000,00 KM.

Novčanom kaznom u iznosu od 300,00 do 1.500,00 KM kaznit će se fizičko lice za prekršaj iz stava 1. ovog člana.

Članovi vezani za član 14:

Član 1.

Ovim zakonom uređuju se prava, obaveze i odgovornosti pravnih i fizičkih lica u oblasti prikupljanja, proizvodnje i prometa korisnih otpadnih materijala, te proizvodnje i prometa sekundarnih sirovina.

U postupanju sa korisnim otpadnim materijalima i sekundarnim sirovinama moraju se poštivati propisi o zaštiti okoline i propisi kojima se obezbjeđuje održavanje kvaliteta tih otpadnih materijala.

Pravna i fizička lica, čijom aktivnošću i obavljanjem djelatnosti se proizvodi otpad, kao i pravna i fizička lica koja obavljaju predtretman, sortiranje ili druge operacije koje dovode do promjene fizičkih karakteristika ili sastava otpada i osobe sa posebnim ovlaštenjima i odgovornostima u pravnom licu dužni su obavjestiti nadležni organ za zaštitu okoline utvrđen članom 40. Zakona o zaštiti okoliša ("Službene novine Federacije BiH", broj 33/03), o otkrivenim negativnim uticajima na okoliš odmah, a najviše 12 sati nakon što se otkrije.

Član 3.

Zabranjeno je spaljivanje, zakopavanje i na drugi način uništavanje otpadnih materijala koji se mogu preraditi u sekundarne sirovine, kao i otpadaka prije izdvajanja otpadnih materijala koji se mogu preraditi u sekundarne sirovine, ako posebnim propisima nije drugačije određeno.

Član 5.

Pravna i fizička lica registrovana za prikupljanje i promet otpadnih materijala i proizvodnje sekundarnih sirovina pri obavljanju djelatnosti moraju ispunjavati tehničko-tehnološke uslove u pogledu opreme i poslovnog prostora.

Federalno ministarstvo energije, rudarstva i industrije propisuje tehničko-tehnološke uslove poslovnog prostora, uređaja i opreme za transportovanje i skladištenje otpadnih materijala i proizvodnju sekundarnih sirovina.

Član 7.

Pravna i fizička lica koje obavljaju djelatnost otkupa i prerade otpadnih materijala dužna su otkup vršiti u skladu sa propisima koje donosi vlada kantona.

Zabranjeno je vršiti otkup materijala nepoznatog porijekla.

Član 8.

Pravna lica koja obavljaju komunalnu djelatnost prikupljanja otpadaka u gradovima i naseljima, dužna su da iz tih otpadaka izdvajaju materijale iz člana 2. ovog zakona i da ih razvrstavaju po vrstama otpadnih materijala i na osnovu ugovora isporučuju privrednim društvima koja se bave preradom i proizvodnjom sekundarnih sirovina.

Pravna lica iz stava 1. ovog člana su dužna da na određenim mjestima u gradu i drugom naseljenom mjestu gdje se pokaže opravdanim, obezbijede i postave obilježene kontejnere za odlaganje korisnih otpadaka po vrstama (staklo, papir, plastika i sl.).

Propis o načinu prikupljanja, odlaganja i razvrstavanja otpada donosi vlada kantona.

Član 9.

Pravna i fizička lica se mogu baviti prikupljanjem i proizvodnjom sekundarnih sirovina ako ispunjavaju propisane uslove iz člana 5. ovog zakona.

Član 10.

Bilansiranje sekundarnih sirovina vrši se putem bilansiranja mogućnosti proizvodnje sekundarnih sirovina, bilansiranje domaćih potreba u sekundarnim sirovinama i utvrđivanja izvoza i uvoza sekundarnih sirovina.

Zabranjuje se uvoz i izvoz otpadaka izvan bilansiranog režima uvoza i izvoza iz stava 1. ovog člana.